

# LA USC DI LADINS - GIOVEDÌ 31 OTTOBRE 2019

POLITICA PROVINZIÈLA

## »Benvegnui« e »Se vedon«

*La PAT à enjignà neva tabletes sui confins provinzièi e su spenta del conseier Luca Guglielmi te Fascia l'è stat metù ence la scritta per ladin*

Jà del 2017 l'era stat metù sui lesc de confin de la Provinzia de Trent na tabela che volea delimitèr apontin l tegnir provinzièl con la scritta »Trentino«, l pavel cernù desche simbol de chest teritorie e i colores e la grafica che caraterisea chesta campagna de parbuda.

Ampò chesta tabletes, che no aea nesciun auter scrit de schiariment, aea l defet che chi che passèa sun strèda no i era bogn de entener delvers l significat e ge restèa l dubie se i era dò a ruèr sul tegnir del

Trentin, se i era dò a se n jir fora o se bele demò i volea ge recordèr che i era tel Trentin.

Per comeder chest problem l'assessor al Turism Roberto Failoni se à dat da fèr acioche sun chesta tabletes vegne metù ence la scrìtes respetivamenter de benvegnù per chi che rua sul tegnir del Trentin e de salut per chi che se n va fora. Chesta scrìtes les é daperdut te trei lengac: talian, todesch e ingleis. Chesta l'è na picola roba, ma una de chela picola robes che deida a

miorèr la parbuda e la percezion da man de chi che rua te noscia provinzia.

La roba amò più bela l'è che su la tabletes de confin loghèdes sul tegnir de Fascia, apede a la scrìtes per talian, todesch e ingleis l'è ence la scritta ladina, che deida l ghest a aer sobito la percezion de esser te n raion olache se rejona n lengaz de mendranza. Na sodesfazion per duc i ladins e se sà ben ence per l conseier provinzièl Luca Guglielmi.

Defat l'è stat apontin l Conseier ladin che ne à segnalà la bela neva, recordan che canche l'è sapù de l'idea de Failoni l ge à domanà sobito de jontèr ite la scritta per fascian, e l'è abù risposta positiva.

En colaborazion con l'Ofize Servijes Linguistics del Comun general de Fascia con sia responsabola Sabrina Rasom l'è stat donca enjignà la traduzions, e ades la scrìtes »Benvegnui« e »Se vedon« fèsc jà bela parbuda su la tabletes loghèdes te Fascia.

### Interogazion sui lurieres de Cernadoi

L conseier Guglielmi é entervegnù enstadi ence con na interogazion te Consei provinzièl domanan cont di lurieres sul tegnir de Cernadoi ta Dëlba. Chisc lurieres per intervenc de sistemazion idraulich-forestala del ruf de Cernadoi fac dai Bacini Montani de la PAT – à scrit Guglielmi – i va inant a na vida belebon peigra da egn e i é al scomenz de un di troes più bie de la frazion, donca de segur no i deida a sporjer na bela parbuda de nosc teritorie. Per chest Guglielmi ge à domanà a l'assessor competent canche i poverit che chisc lurieres posse vegnir sturtè sù e se posse serèr sù l cantier. LG



La tabletes de la Provinzia de Trent con la scritta ence per ladin.

